

pri Christum. Habere autem caput Christum nemo poterit, nisi qui in eius corpore fuerit. quod est Ecclesia. Quod etiam variis rationibus confirmat sermone 181. de tempore. 1. Quia in sola Ecclesia immolatur hostia Salvatoris. 2. In sola vinea laborantes accipiunt mercedem denarij. 3. Omnes, qui extra Arcam Noë fuerunt, diluvio extinti sunt. 4. Membrum, quod non manet in corpore, vitam habere non potest. Quintò, Ramus præcisis ab arbore, non potest germinare. Sextò, Riuus à fonte separatus exarescit.

3. Alij hanc addunt: Christus est Spōsus Ecclesiae: At Christus non est adulter, nec generat filios ex adultera: Ergo nō generat filios, nisi ex Sponsa sua Ecclesia Nemo igitur filius Christi est, nisi matrem agnoscat Ecclesiam. Quò spectat illud Cypriani libro de vnitate Ecclesiæ: Non habet Deum Patrem, qui Ecclesiam non habet matrem. Quod etiam repetit Augustinus libro quarto de Symbolo ad Catechumenos capite 13.

## C A P V T VII.

### *De Ministris Synagogæ Ordinariis, qui erant Leuitæ, Sacerdotes, & Pontifex.*

1. **N** statu naturæ, qui durauit ab Adamo vsque ad Moysen, omnes primogeniti erant Sacerdotes, & diuino cultui peculiariter mancipati. At in statu legis Mosaicæ, qui durauit à Moysè vsque ad Christum, voluit quidem Deus omnes primogenitos sibi

### *De Ministris Synagogæ Ordinariis. 113*

sibi sanctificari. ( Exodi 13.2. ) Sed tamen in illorum locum, ex duodecim tribubus Israël, elegit tribum Leui, eamque diuino seruitio præ cæteris destinauit, iuxta illud Numerorum 3. 12. Ego ulti Lenitas à filiis Israël pro omni primogenito in filiis Israël, erunque Leuitæ mei. Et capite octavo, 6. Tolle Lenitas de medio filiorum Israël, & purificabis eos. Et infra: Statues Lenitas in conspectu Aaron & filiorum eius, & consecrabis oblatos Domino, ac separabis de medio filiorum Israël, ut sint mei: Et postea ingredientur tabernaculum fiederis, ut seruant mihi. Et iterum: Tuli Lenitas pro cunctis primogenitis filiorum Israël, ut seruant mihi in tabernaculo, & orent pro eis, ne sit in populo plaga.

2. Porro in tribu Leui tria hominum genera distingui solent. Primo, Leuitæ propriè dicti. Secundo, Sacerdotes. Tertio, Summus Sacerdos seu Pontifex. Tametsi omnes, qui erant ex tribu Leui, generatim vocati fuerint Leuitæ, seu filij Leui; tamen ex vsu Scripturæ, Leuitæ propriè dicti distinguebantur à Sacerdotibus & Pontifice. Nam illi soli vocabantur Sacerdotes, qui offerebant victimas & sacrificia. Illi vero Leuitæ, qui Sacerdotibus ministrabant. Inter Sacerdotes, qui erat summus, vocabatur Pontifex.

3. De his omnibus, ac potissimum de Pontifice, agendum est hoc ordine. Primo, Ex qua familia fuerit Pontifex. Secundo, Quæ fuerit successio Pontificum. Tertio, Quo ritu consecrati fuerint Leuitæ, & Sacerdotes, & Pontifex. Quartò, Quod fuerit illorum officium. Quintò, Quo vestitu & ornatu fuerint vti. Sextò, Quos & quantos

redditus habuerint. Septimò, An aliquando debuerint seruare continentiam ab vxoribus. Octauò, Quanta fuerit illorum, & potissimum Pontificis authoritas apud populum. Nonò, Quæ utilitas ex his omnibus colligi possit.

## QVÆSTIO I.

*Ex qua familia fuerit Pontifex?*

1. IN tribu Leui erant multæ familiæ, quæ omnes seruicio diuino destinabantur. Pontificatus, seu summum Sacerdotium, secundum legem ordinariam, erat in sola familia Aaronis. Habuit autem Aaron quatuor filios, Nadab, Abiu, Eleazar, & Ithamar. (Numer. 3. versu 2.) Hi omnes simul à Moysè consecrati sunt; Aaron quidem in summum Sacerdotem, seu Pontificem; filij eius in simplices, seu minores Sacerdotes. (Exodi vigesimonono per totum.) Duo primi, Nadab & Abiu, occisi sunt à Deo, quod ignem alienum obtulissent. (Leuitici decimo, versu primo.) & sine liberis decesserunt. (primo Paralipomenon vigesimoquarto, versu secundo.) Reliqui duo, Eleazar & Ithamar, manserunt in officio Sacerdotali, cum hoc tamen discrimine, ut Eleazar succederet Patri in Pontificatu, non autem Ithamar: Et rursus Eleazaro succederet filius eius primogenitus; & huic etiam primogenitus, & sic deinceps. Alij omnes essent simplices Sacerdotes.

QVÆ

## QVÆSTIO II.

*Quæ fuerit successio Pontificum?*

1. Aron fuit primus Pontifex à Deo constitutus, & à Moysè consecratus, cum iure successionis. (Ecclesiast. 45.8.) Quod addo propter Moysen, qui fuit etiam Pontifex, & quidem ante Aaronom; sed extraordinarius, & sine iure successionis. Nam filii Moysis non erant Pontifices; imòne Sacerdotes quidem, sed tanrū Leuitæ, qui seruiebant Sacerdotibus. (1. Paralipomenon 23.14.)

2. Aaroni successit Eleazar, filius eius cum patri potestate; & huic similiter Phinees, cui propter zelum diuini honoris, promisit Deus sempiternum Pontificatum, iuxta illud 25.13. Erit tam ipsi, quam semini eius, pactum Sacerdotij sempiternum, quia Zelatus est pro Deo suo, & expiavit scelus filiorum Israël. Et 1. Machab. 2.25. Phinees pater noster Zelando zelum Dei, accepit testamentum Sacerdotij aeternum. Idem repetitur Eccles. 45.28.

3. Hic duæ occurrent difficultates. Vna, cur Deus promiserit Phineæ & semini eius Pontificatum sempiternum, cum ei deberetur iure successionis? Nam Phinees erat primogenitus Eleazari: primogenitus autem ex Dei ordinatione succedebat Patri in Pontificatu. Altera, quomodo hæc promissio fuerit impleta, cum constet, Heli & multos alios fuisse Pontifices, qui tamen non erant ex semine Phineæ, sed ex familia Ithamar?

I. 4. Ad

+ Ad priorem sic respondeo. Ius successionis in eo consistebat, ut Patri succederet filius primogenitus, si viueret. Si autem Patre adhuc superflite, moreretur primogenitus, tunc secundogenitus in eius locum subrogaretur. Itaque primogenitus nunquam erat certus, se successorum Patri in Pontificatu, nisi mortuo Patre. Nam illo viuo, non erat certus, se vieturum post Patrem. Deus ergo, viuente adhuc Eleazaro, promisit fore, ut Phinees, qui erat primogenitus Eleazari, superflues esset parenti suo, & ei in Pontificatu succederet cum suis posteris, quod etiam factum est.

5. Ad posteriorem duplex est responsio. Una, promissionem illam fuisse verè impletam, quia ius Pontificatus semper mansit apud posteros Eleazari & Phineæ, tametsi usus illius iuris aliquandiu fuerit in familia Ithamar. Itaque posteros Eleazari & Phineæ semper fuisse Pontifices de iure, posteros vero Ithamar fuisse aliquando Pontifices de facto. Altera, promissionem illam non fuisse absolutam, sed conditionatam, ac proinde, quamdiu seruata est conditio, validam fuisse promissionem: quando autem desit seruari, reuocatam esse. Fuisse autem hanc conditionem, ut ius Pontificatus maneret apud posteros Eleazari & Phineæ, quamdiu benè ac legitimè eo fungentur: Si secus facerent, priuarentur illo iure. Fecisse autem secus: itaque priuatos esse.

6. Ego, saluo meliori iudicio, puto utramque responzionem temperandam esse hoc modo. Duo spectari possunt in Pontificatu. Primò, Ius seu potestas ordinaria. Secundò, Usus seu exercitium.

Ius

Ius absolutè promissum est Phineæ, & posteris eius. Usus seu exercitium sub conditione, si non offendarent. Itaque posteri Phineæ semper fuerunt Pontifices de iure: Posteri vero Ithamar, fuerunt aliquando de facto.

7. Post Phinees, in eadem linea, successerunt hi tres, Abisue, Bocci, Ozi. Deinde translatus est Pontificatus ad posteros Ithamar; ac primum ad Heli, ut tradit Iosephus libro quinto antiquit. in fine, & alij. Hic tria disputari solent. Primo, Quare haec translatio facta sit? Respondeo. In pœnam peccati, & negligentiae cultus diuini. Secundò, quamdiu manserit Pontificatus in familia Heli? Respondeo: usque ad tempora Salomonis, qui elecit Abiathar, & assumpit Sadoc, (ut paulo post dicam.) Tertiò, quis successerit Heli in Pontificatu? Respondeo. Heli habuit duos filios Sacerdotes, Ophni & Phinees. (Primo Regum primo, versu tertio.) Vterque mortuus est ante Patrem. (1. Regum 4. 11.) Itaque neuter potuit illi in Pontificatu succedere. Porro Ophni nullum legitur reliquissim filium. Phinees reliquit duos, Achitob, & Ichabod posthumum. (1. Regum 4. 21. & 1. Regum 14. 3.) Achitob successit Heli aucto suo in Pontificatu, & alij deinceps hoc ordine.

- I. Heli, Pontifex & Iudex, 1. Reg. 1.
- II. Achitob, nepos Heli, 1. Reg. 14. 3.
- III. Achias, filius Achitob, sub Saule ibidem.
- IV. Abimelech filius Achitob, & frater Achias. 1. Reg. 14. 3. qui Dauidi fugienti dedit panes propositionis, & gladium Goliad. (1. Reg. 21.) & ob eam causam

I 5 à Saule,

*Caput septimum*

- à Saule, cum aliis Sacerdotibus, occi-  
sus est ( 1. Reg. 22.)
- V. Abiathar, filius Achimelech, qui euasit  
manum Saulis & fugit ad Dauidem  
( 1. Reg. 22. 20.) Manxit autem in Pon-  
tificatu usque ad tempora Salomonis,  
( 3. Reg. 2. 27.)
8. Post Abiathar, iterum rediit Pontificatus ad  
familiam Eleazari & Phinees. Nam Salomon,  
ut insinuauit, eiecit Abiathar, propter conspira-  
tionem cum Adonia factam, & in locum eius  
subrogauit Sadoc, qui erat ex linea Eleazari,  
( 3. Reg. 2. 27.) Porro à Sadoc usque ad capti-  
vitatem Babyloniam fuit hic ordo Pontificum,  
quantum ex Scripturis colligi potest.
- I. Sadoc vngitur in Pontificem sub Salo-  
mone, ( 1. Paralip. 29. 22.)
- II. Achimaas
- III. AZARIAS } filii Sadoc.
- IV. AMARIAS, sub Iosaphat Rege, ( 2.  
Paralip. 19. 11.)
- V. IOIODA, sub Athalia & Ioas, ( 4. Reg.  
12. 7. & 2. Paralip. 12. per totum.) Vxor  
eius fuit filia Regis Ioram, ( 2. Paralip.  
22. 11.) Mortuus cum esset annorum cen-  
tum & triginta ( 2. Paralip. 24. 15.)
- VI. ZACHARIAS, filius Ioiadæ, sub fine  
regni Ioas, ( 2. Paralip. 24. 20.) qui iussu  
Regis, à populo lapidatus est in atrio  
domus Domini ( ibid. vers. 21.)
- VII. AZARIAS, qui reprehedit Oziam Regem  
eo quod vellel adolere incensum super  
altare thymiamatis ( 2. Paralip. 26. 17.)

VIII.

*De Ministeriis Synagogæ Ordinariis. 119*VIII. VRIAS, sub Rege Achaz. ( 4. Regum  
16. 10.)IX. AZARIAS, sub Ezechia ( 2. Paralip.  
31. 10.)X. SOBNA, sub eodem contra quem pro-  
phetat Isaías cap. 22. v. 13. usque ad fi-  
nem capitii.XI. ELIACIM, filius Helciæ, sub Manasse,  
quem Isaías c. cit. vers. 20. prædicto lo-  
co Sobnæ collocandum in Pon-  
tificatu.XII. HELCIAS, sub Iosia ( 4. Reg. 22. & 23. Et  
2. Paralip. 24.)XIII. SARAIAS, qui cum Sedecia Re-  
ge ductus est in captiuitatem Baby-  
lonicam ( 4. Regum 25. Ieremiæ 5. 2.  
24.)9. Sub initium captiuitatis, cum Saraias Ponti-  
fex ductus esset in Babylonem, successit illi Phasur,  
filius Emmer, qui Ieremiam vinxit in carcere.  
( Ieremiæ vigesimo, versu primo.) An autem fuerit  
verus & legitimus Pontifex, meritò à quibusdam  
dubitatur. Porro post captiuitatem Babyloniam,  
primus Pontifex fuit Iosue, filius Iosedec, ex fami-  
lia Eleazari, cum hac successione.I. IOSVE, filius Iosedec, sub Cyro & Da-  
rio ( 1. Esdræ 3. 2.) cœpit cum Zoroba-  
bel ædificare templum in Ierusalem  
( 1. Esdræ 5. 2.)

II. IOACIM, filius Iosue.

III. ELIASIB, filius Ioaçim

IV. IOADA, filius Eliasib } 2. Esdræ 2. 10.

V. IOATHAN, filius Ioadæ

VI.

- V I. I E D D O A, filius Ioathan ( ibidem ) qui ab aliis vocatur Iaddus. Hunc Alexander Magnus , Ierosolymam accedens adorauit, teste Iosepho lib. 13. cap. vlt. Cuius frater Manasses ædificauit templum Samaritanum in Garizim , apud eundem Iosephum lib. 11. cap. 7.
- V II. O N I A S 1, Iaddi filius.
- V III. S I M O N , filius Oniae, cognomento iustus. ( Ioseph. lib. 22. cap. 3.)
- I X. E L E A Z A R V s, frater Simonis , qui petente Ptolomæo Philadelpho , misit in Ægyptum 72. interpretes, qui vetus Testamentum ex Hebraico sermone in Græcum transtulerunt. ( Ioseph. lib. 12. cap. 2.)
- X. M A N A S S E S , Iaddi filius, Oniae frater. ( Ioseph. lib. 12. cap. 3.)
- X I. O N I A S 2. Simonis Iusti filius, qui iam senior tributum Ptolomæo Euergetæ negavit. Vnde multa mala fuissent consecuta , nisi Iosephus Tobiæ & sororis Pontificis filius, legationem suscepisset ad Ptolomæum.
- X II. S I M O N 2. frater Oniae secundi , de quo Iosephus lib. 12. cap. 4. sub finem.
- X III. O N I A S 3. filius huius Simonis , ad quem Rex Spartiarum Arius misit legationem cum literis ( 1. Machab. 12. 20.) De hoc Onia viro sanctissimo multa habentur 2. Mach. 3. & 4.
- X IV. I A S O N , frater Oniae, qui, viuente adhuc O N I A , malis artibus, ab Antiocho Re-

ge

De Ministris Synagoge Ordinariis. 121  
ge Pontificatum obtinuit per trien-  
nium. (2. Mach. 47.)

- X V. M E N E L A V S , qui cùm non esset de gene-  
re Sacerdotali (erat enim ex tribu Ben-  
iamin) Iasoné post tres annos de Pon-  
tificatu deiecit, & sibi illum à Rege de-  
ferri curauit. (2. Mach. 4. 24.) Sed cum  
promissas Regi pecunias nō solueret,  
iterum depositus est, subrogato in eius  
locum Lysimacho. (2. Mach. 4. 29.)
- X VI. L Y S I M A C H V S , Menelai frater, qui à po-  
pulo interfactus est. (2. Mach. 4. 41.)
- X VII. A L C I M V S , ex familia Aaronis, qui me-  
rito Pontificatum amisit , eo quod ri-  
tibus gentilium se contaminasset. (2.  
Mach. 14. 3.)
- X VIII. M A T H A T I A S , Machabæorum pater,  
quem alij affirmant, alij negant fuisse  
Pontificem. Vide nostrum Serarium  
in Commentario libro 1. Mach. c. 2.
- X IX. I U D A S M A C H A B Æ V S , Mathatiæ filius, de  
quo Iosephus l. 12. cap. 17.
- X X. I O N A T H A S , frater Iudæ. ( 1. Mach. 12. 6.)
- X XI. S I M O N , Iudæ & Ionathæ frater. (1. Ma-  
chab. 14. 20.)
- X XII. I O A N N E S H I R C A N V S , Simonis filius. (1.  
Machab. 16. 24.)
- X O. Reliqui Pontifices, qui deinde secuti sunt,  
vsque ad tempora Christi & Apostolorum, ex pro-  
phana historia petendi sunt. Nam in Scriptura sa-  
cra nulla fit eorum mentio. Solum ex Euangелиo  
constat, Annam & Caiphâ fuisse Pótifices, de qui-  
bus hic nihil dicendum est. Illud porro in hac tota  
serie

serie & successione Pontificum notari debet, generalem fuisse legem seu ordinationē Dei, vt nullus Pontificatus nisi per mortem defungeretur; nec alias, priore adhuc viuente, subrogari posset. Quæ tamen lex, præsertim quando Reges & Principes sæculares immiscuerunt se rebus Ecclesiasticis, aliquoties seruata non est. Primo, sub Salomone, qui eiecit Abiathar à summo Sacerdotio, & subrogauit illi Sadoc. Secundo, sub Antiocho Rege, cuius autoritate, primum quidem Onias Pontificatus abire compulsus est: tum Iason & Menelaus successuè substituti; demum illi ipsi de gradu iterum deiecti sunt. Tertio, sub Herode, qui pro suo arbitrio posuit, & remouit, quos voluit. Et quidem Antiochus & Herodes in hac re abusi sunt potestate regia, & merito ab omnibus reprehenduntur. De Salomone, recte an secus fecerit, quæstio est, de qua alibi.

## QVÆSTIO III.

*Quo ritu consecrati fuerint Leuitæ, Sacerdotes, & Pontifex?*

1. **T**Ametsi Leuitæ, Sacerdotes, & Pontifex, iure successionis haberent sua officia, non tamen poterant ea actu exercere, nisi prius certo ac legitimo ritu consecrati essent. Ritus consecrandi Leuitas habetur Numeror. 8. 6. Et tria potissimum in eo spectanda sunt. 1. Purificatio. 2. Consecratio. 3. Applicatio ad usum ministerij. Purificabantur Leuitæ, ante consecrationem, quatuor modis. 1. Aspersione aquæ lustrationis. 2. Ratione

*De Ministris Synagoga Ordinariis.* 123  
sione pilorum totius corporis. 3. Lotione vestimentorum. 4. Oblatione sacrificij pro peccato.

2. Aqua lustrationis, seu expiationis, dicebatur, cui cineres vaccæ ruffæ infusi erant. Huius aspersione mundabantur, quicumque contraxerant aliquam immunditiam legalem, sive ex contactu cadaveris, sive aliunde. (Numer. 19. per totum.) Nec vlli immundo licebat accedere tabernaculum, nisi prius hac aqua mundatus & expiatus esset. (ibidem.)

3. Rasio pilorum totius corporis, & lotio vestimentorum, non solum in purificatione Leuitarum, sed etiam in expiatione leprosorum adhiberi solita est. (Leuitici 14. vers. 7.) Diuerso tamen modo. Nam leprosi ideo radebat pilos capitis, barbae, superciliorum, & totius corporis, & lanabat vestimenta, vt nihil apud se haberent, in quo lepra posset foueri aut occultari. Leuitæ vero, vt per illam externam mundationem monerentur se interiorius ab omni lepra spirituali purgatos esse oportere: Nec Deum minus abhorrire ab iis ministris, qui animo ac mente inquinati, quam homines ab iis, qui lepra corporali infecti sunt.

4. Post peractam hanc purificationem Leuitarum, sequebatur eorum consecratio, quæ in eo consistebat, quod Aaron acciperet eos à filiis Israël, loco primogenitorum, & offerret illos Deo in ministerium tabernaculi, & pro illis oraret, vt bene fungerentur suo officio. Hoc significant illa verba Numer. 8. 11. *Offeret Aaron Leuitas munus in conspectu Domini, à filiis Israël, ut seruant in ministerio eius.* Et iterum; *Elevans eos Aaron in conspectu Domini, & orauit pro eis.*

5. Cum

5. Cum hoc modo iam essent consecrati, applicabantur ad usum ministerij, eo ipso, quod introniterentur in tabernaculum foederis Domini, iuxta illud; ut purificari ingredierentur ad officia sua in tabernaculum foederis coram Aaron & filio eius. Hæc de Leuitis.

6. Ritus consecrandi Pontificem & Sacerdotes, quo usus est Moses in consecratione Aaronis & filiorum eius, habetur Exodi 29. & Levit. 8. per totum. In quo etiam tria spectari debent. 1. Purificatio Pontificis & Sacerdotum. 2. Consecratio. 3. Applicatio ad usum ministerij. Purificatio fiebat duobus modis. Primò, lotione totius corporis Secundò, oblatione sacrificij pro peccato. Consecratio perficiebatur hoc ordine. 1. post lotionem, Pontifex ornatus Pontificali, & Sacerdotes sacerdotali inducebantur. 2. Pontifex vngebatur oleounctionis in capite, nō item Sacerdotes. 3. Tam Pontifex quam Sacerdotes in extremo auricula dextræ, & similiter in pollice manus ac pedis dexteri, tingeabantur sanguine arietis immolati. 4. Non solum Pontifex & Sacerdotes, sed etiam uestes eorum, sanguine arietis & oleounctionis aspergebantur. Denique multa ex canistro panum, & ex ariete immolato, dabantur illis in manus, ut ea leuarent coram Domino: quo signo, non solum dabatur illis potestas sacrificandi, sed simul applicabantur ad usum ministerij, quod potissimum consistebat in sacrificando.

7. Cæterum, ut maior esset solennitas huius actionis, triplex in ea sacrificium offerebatur. 1. Vitulus in hostiam pro peccato. 2. Aries unus in holocaustum. 3. Aries alter in hostiam pacificata.

cam. Igitur tota series actionis procedebat hoc modo & ordine. Primò, Aaron & filii eius, qui erāt consecrandi, publicè coram toto populo adducabantur ad tabernaculum, & ibi lauabantur aqua. 2. Aaron induebatur habitu Pontificali, & super caput eius fundebatur chrisma, seu oleum unctionis. 3. Filii Aaronis inducebantur habitu Sacerdotali, non tamen fundebatur oleum unctionis super capita illorum. 4. Adducebantur ad ostium tabernaculi vitulus & duo arietes: & præterea adferebantur panes azymi in canistro, cum quibusdam aliis ad eundem usum pertinentibus.

8. Deinde, sequebatur primum sacrificium, id est, immolatio vituli pro peccato, hoc modo. 1. Aaron & filii eius imponebant manus super caput vituli, qui macabatur. 2. pars sanguinis eius ponebatur super cornua altaris; pars altera fundebatur ad hasim eius. 3. rotus adeps, qui operit intestina, & reticulum iecoris, & duo renes cum suo adipe, incendebantur super altare. 4. Carnes, corium, & simus comburebantur foris extra castra.

9. Mox succedebat secundum sacrificium, id est, immolatio unius arietis in holocaustū hoc ordine. 1. Impositis super caput eius manibus, macabatur. 2. Sanguis eius spargebatur super altare per circuitum. 3. corpus secabatur in partes. 4. Intestina lauabantur. 5. pedes & intestina iam lata ponebantur super caput & alias partes. 6. hæc omnia incendebantur super altare.

10. Postea macabatur alter aries in hostiam pacificam, hoc ritu. 1. Moyses sumebat de sanguine eius, & obliniebat extreum auricula dextræ

K Aaronis,

Aaronis & filiorum eius, itēmque pollicem manus ac pedis dextri. 2. spargebat sanguinem super altare per circuitum. 3. Sumebat de sanguine, qui erat super altare, & de oleo vunctionis, & aspergebat Aaronem, & filios eius, & vestes eorum. 4. sumebat adipem, caudam, pinguedinem, quæ operit intestina, reticulum iecoris, duos renes cum adipe eorum, armum dextrum, portionem panis, crustulam oleatam, & laganum, & tradebat Aaroni & filiis eius, ut leuarent coram Domino. 5. Suscipiebat iterum omnia de manibus eorum, & incendebat super altare in holocaustum.

11. Quæres primò, quamdiu durauerit hæc tota actio consecrationis Aaronicæ? Respondeo. Durauit septem diebus, ut expressè habetur Exodi vigesimo nono, versu trigesimo quinto. *Septem diebus consecrabis manus eorum.* Et Leuitic. 8. vers. 33. De ostio tabernaculi non exhibitis septem diebus, usque ad diem, quo complebitur tempus consecrationis vestra. Septem enim diebus finitur consecratio. Quod tamen duobus modis intelligi potest. Primo, quod tota actio consecrationis paulatim & successiue, spatio septem dierum peracta sit: ita ut Aaron & filii eius primum quidem loti sint; deinde sacro habitu ornati; tum vnḡti, tincti, & aspersi; ac sic deinceps, donec tandem die septimo finis actioni sit impositus. Secundò, quod tota consecratio cum omnibus ritibus ac ceremoniis, primo die fuerit integrè absoluta, & postea per sequentes dies quotidie integrè repetita; ita ut Aaron & filii eius septies fuerint loti aqua, septies induiti sacro habitu, septies vnḡti, tincti, & aspersi; & septies ter-

na

*De Ministris Synagoge Ordinariis.* 127  
na sacrificia Deo oblata. Hoc posterius tenent Iosephus, Lyranus, & plures alij. Et colligitur ex verbis paulo ante citatis: *Sepeem diebus consecrabis manus eorum.*

12. Dices, inde non sequitur, quotidie omnes ceremonias fuisse repetitas, sed tantum aliquas. Fateor, non sequi euidenter, sed solum probabiliter. Et ideo, præter duas expositiones iam allatas, potest dari tertia, quæ sit media inter vtramque: nimirum, quod tota consecratio, cum omnibus ritibus ac ceremoniis, primo die fuerit integrè absolute: & postea per sequentes dies aliquæ tantum ceremoniæ fuerint repetitæ, præsertim hæ quatuor. 1. Vnctio manuum Sacerdotum. 2. Immolatio vituli. 3. Mundatio altaris. 4. Vnctio altaris. Nā harum peculiari fit mentio Exodi vigesimo nono, versu trigesimo quinto. Vide Cornelium ibidem.

13. Quæres secundò, Quare tot ceremoniæ adhibitæ fuerint in consecratione Pontificis & Sacerdotum? Respondeo. Tres causæ assignari possunt. Vna ex parte officij Sacerdotalis: Altera ex parte ipsorum Sacerdotum. Tertia ex parte populi seu subditorū. Igitur prima causa est, quia Deus per tot ritus, ceremonias, ac solenitates, voluit ostendere prestatiam, dignitatē, & sanctitatem officij Sacerdotalis. Et quod nemo ad officium tam sanctum ac diuinum deberet accedere, nisi prius à Deo speciatim electus, & publicè coram populo in huc finem esset cōsecratus. Hinc grauissimè puniti sunt, qui ingesserunt se in officium Sacerdotale, cum nō essent cōsecrati. Exemplum habemus in Chore,

K 2 Ie

Ieroboam, & Ozia. Choræ viuus à terra absorptus est. (Num. 16.) Ieroboamo manus repete exaruit, (3. Rex. 13.) Ozias lepra percussus est. (2. Paral. 26.)

14. Secunda causa est, vt ipsi met Pontifices & Sacerdotes ex illis ritibus ac ceremoniis caperent duplice vtilitatem. Primò quidem, vt meminissent, se debere esse sanctos & puros corā Domino, qui ad tam sanctū & purum ministerium electi à Deo, & consecrati essent: Et sanè tanto maiorem sanctitatem ac puritatem ab ipsis, quam à populo requiri; quād ip̄si, quam populus, in sanctiori gradu ac statu essent collocati. Secundò, vt in aduersitatibus & periculis, quæ sāpē occurruunt in tali officio, possent seipsoſ ſolari & erigere. Nam ſicut illi, qui praeſunt aliis in rebus temporalibus, ſāpe vel à suis ſubditis, vel ab hostibus affligūtur; ſic multo magis cōtingit illis, qui in cura animarū principatum tenent. Hoc in veteri testamento experti ſunt Aaron (Num. 16.) Zacharias (2. Paralip. 24.) Azarias (2. Paralip. 26.) Et in nouo Apostoli, Matth. decimo vers. decimo ſexto. *Venit hora, vt omnes, qui interficiunt vos, arbitrietur, obsequium ſe praſtare Deo.* Et nominatim sanctus Paulus 2. Corinth. 11. vers. 23. *In laboribus plurimiſ, in carceribus abundantius, in plagiis ſupra modum, in mortibus frequenter.* Ter virgis caſus ſum, ſemel lapidatus ſum, ter naufragium feci, &c. Cum ergo huiusmodi viri tormentiis expoſiti ſint, neceſte eſt, habeant aliquid quo ſe ſolentur, ne oneri ſuccumbant. Id in veteri Testamento factum eſt per ſolennes ritus ac ceremonias, quibus Sacerdotes, & Pontifices, ex mādato Dei conſecrabantur. Nam inde certo illis

conſta

conſtabat, ſe à Deo ſpeciatim electos ac designatos eſſe, vt in tali officio Deo miniftrarent; ac proinde, vt omnia aduersa, quę tali officio annexa eſſent, libenti ac forti animo ſuſtinerent. Ex quo vñterius facilē ſibi perſuadebant: quidquid ratione vocationis acerbum ac moleſtum eueneret, non niſi in bonum exitum, diuina ordinatione ceſſurum. Simile eſt in nouo Testamento.

15. Tertia cauſa eſt, vt etiam ſubdiſ ex tali ceremoniarum ſolemnitate fructum aliquem perci- perent. Qui quidem fructus erat duplex. Alter, quod ex publica conſecratione certò agnoſcere nt ſuos paſtores, quibus ipsorum ſalus commiſſa eſſet. Alter, quod ſcirent, quantum honorem, & reuerentiam propter sanctitatem officij pŕaefare illis oporteret. De quo puncto alibi itērum dicendum eſt.

16. Hinc etiam apparet analogia veteris ac noui Testamenti. Nam ſicut in veteri, nemo poterat exercere officium Sacerdotale, niſi à Deo vo- catus, & à Pontifice ſolemni ritu conſecratus eſſet; ſic etiā ſit in nouo. Quod diſertè afferit Apoſtolus Hebr. 5. 4. *Nec quisquam ſumit ſibi honorem, ſed qui vocatur à Deo, tanquam Aaron, id eſt, ſicut Aaron vocatus eſt.* Vbi per vocationem intelligit etiam conſecrationem. Ritus autem, qui in nouo Testamento vñſurpantur, ſunt varij. Nam aliqui ha- bentur ex ſcriptura, vt impositio manuum Epifcopi. 1. Timoth. 4. 14. & 2. Timoth. 1. 6. Alij ex Traditione Apoſtolorum, vt vñctio, teſte Dionyſio Areopagita cap. 4. de Hierarchia Ecclesiastica. Alij ex vſu & praxi Ecclesiæ, vt multi ex iis, quorum fit mentio in Pontificali.

17. Solent Lutherani & Caluinistæ ridere vñctionem Sacerdotalem, quæ usurpatur à Catholicis, tanquam ceremoniam Iudaicam, ac proinde minimè tolerandam. Sed temerè: Primo, quia impositionis manuum non minus fuit vñscrita à Iudeis, quam vñctio. Si ergo impositionis manuum potest tolerari, & re ipsa ab Apostolis tolerata & usurpata est; cur etiā vñctio tolerari & usurpari non possit? Deinde, aliud est vti aliqua ceremonia, qua vi sunt Iudei; aliud vti ad eum finem, ad quē vi sunt Iudei. Nos prius facimus, non posterius. v.g. Vt ebantur ipsi ablutione aquæ ad abstergendam immunditiam legalem. Nos etiam vtimur ablutione aquæ in baptismo: sed ad abstergendam maculam peccati originalis. Similiter vtebantur ipsi impositione manuum, vñctio olei, pane sanctificato, aqua lustrationis; quibus etiam nos vtimur: sed alium ipsi, alium nos finem & intētionem habemus. Ipsi erant in umbra; nos in luce sumus. Illi Christum venturum præfigurabant; nos præsentem honoramus. Vide Bellarminum de Sacramento ordinis cap. 12. in fine.

18. Quæres 3. An quotiescumque post Aaronē facta fuit consecratio alicuius Pontificis, semper adhibitæ sint omnes ceremoniæ, quæ in consecratione Aaronis adhibitæ sunt: nimirum lotio, ornatius, vñctio in capite, tinctio, aspersio, sacrificiū, & solennitas septem dierum. Non videtur id factum esse in consecratione Eleazari, qui proximè successit Aaroni. Nam nihil aliud in ea factum est, quam quod in monte Horeb induerit vestem Pontificalem, quā vñscus fuerat Aaron, & cum ea descendenter ad populum (Num. 20. 25.)

19. In

19. In hac difficultate sunt tres opiniones. Prima, quod Eleazarus ex speciali Dei voluntate ac dispositione factus sit Pontifex, sine solemnī ritu consecrationis, per solam assumptionem vestis Pontificalis. Altera, quod ritus consecrationis verè adhibitus sit, non quidem in monte Hor ( propter defectum tabernaculi, quod manserat in inferiori loco, in medio castrorum) sed postea, cum ex monte rediissent ad tabernaculum; vel certè cùm expugnassent & occupassent terram duorum Regum Amorrhæorum; vel denique cùm post transitum Iordanis, venissent in terram promissionis. Tertia, quod non opus fuerit adhibere totam solemnitatem, sed solam vñctionem & ornatum Pontificalem. Ratio est, quia Eleazarus iam ante solemnī ritu consecratus fuerat Sacerdos, cum tribus fratribus & Aarone Patre. Ergo iam adhibitæ fuerant omnes ceremoniæ, quæ erant communes Sacerdotibus & Pótifici. Ergo solum necesse erat, eas adhibere, quibus Pontifex distinguebatur à Sacerdotibus. Illæ autem erant duæ tantum, nempe vñctio in capite, & assumptio ornamenti Pontificalis. Vtraque potuit adhiberi in monte Hor. Et de altera quidem constat; de altera verò credibile est, adhibitam fuisse.

20. Ego, saluo meliori iudicio, sic sentio. Primo, ex præcepto diuino necessariū fuisse, vt quicunque Pontifex crearetur, septem diebus manete in tabernaculo, in habitu Pontificali. Secundo, vt vngueretur oleo vñctionis in capite. Tertio, vt pollex dextræ manus ac pedis, itēque extremitum auriculae, tingeretur sanguine arietis immolati. Hæc tria colliguntur ex verbis Exodi 29. 19.

Vestem autem sanctam, qua utetur Aaron, habebunt filii eius post eum, ut vngantur in ea, & consecrentur manus eorum. Nec dubito, quin seruata sint in consecratione Eleazari, tametsi Scriptura expressè id non dicat. De lotione nihil certi definiri potest.

## Q U E S T I O   I V .

Quod fuerit officium Pontificis &  
Sacerdotum?

1. R espondeo. Pontifex habebat quædam officia communia cum aliis Sacerdotibus; quædam sibi propria ac peculiaria. Communia erant hæc decem. Primum, offerre victimas, seu sacrificia super altare holocausti (Leuit. 1. 2. 3.) Secundum, in eodem altari, in usum sacrificiorū, alere seu nutrire perpetuum ignem, subiicendo illi quotidie ligna (Leuit. 6. 12.) Tertiū, bis quotidie, id est, mane & vespero, ponere & adolere incensum super altare thymiamatis. (Exod. 30. 1.) Erat enim duo altaria legitima: Vnum holocausti, in quo victimæ seu sacrificia offerebātur: alterum thymiamatis, in quo aromata suauissimi odoris incendebātur. Hoc aureum, illud æreum. Quartum, bis quotidie, affuso oleo oliuarum, concinnare lucernas, quæ erant in candelabro aureo, iuxta altare thymiamatis. (Exodi 25.v.37. & Leuit. 24.v.2.) Quintum, singulis Sabbatis duodecim panes calidos ponere super mensam propositionis, & veteres inde remouere ac comedere. (Exodi 25.v. 23. & Leuit. 24.ver.5.) Sextum, immolare vaccam ruffam

## De Ministris Synagoge Ordinariis. 133

ruffam extra castra. (Numer. 19.3.) Septimum, adiuuare mulieres in casu zelotypiæ. (Numer. 5. 19.) Octauum, discernere inter lepram & leprā. (Leuit. 13. per totum.) Nonum, expiare seu mundare leprolos, puerperas, menstruatas, & seminifluos. (Leuit. 12. & sequentib.) Decimum, Legem Dei scire, interpretari, & alios docere. (Aggæi 2. 12. & Malachiæ 2.7.)

2. Propria erant hæc quatuor. Primum semel in anno, nimirum in solemini die expiationis, seu propitiationis introire in Sanctuariū, seu in Sancta Sanctorum, (Hebr. 9.7.) & instituere publicam expiationem totius populi, ab omnibus peccatis & immunditiis toto anno cōtractis, (Leuit. 16. per totum.) Vbi notandū est, duplēcē fuisse expiationem in veteri Testamēto: vnam priuatam & particularem, qua vel leprosi, vel puerperæ, vel alij, qui habebant aliquam immūditiam legalem, expiari solent: alteram publicam & vniuersalem, qua tota multitudo, seu Ecclesia Israëlitarū mundabatur. Prior fiebat sæpe in anno; posterior, de qua hīc agimus, semel dumtaxat. Prior à quouis Sacerdote; posterior à solo Pontifice. Prior extra Sanctuarium, posterior partim in Sanctuario, partim extra. Fiebat autem hoc ritu. 1. Tonus populus cessabat eo die ab omni opere seruili, & ieunabat usque ad vesperam. 2. Pontifex lauabat se aqua, & induebat vestes Pontificales. 3. Antequam inciperet publicam expiationem, præmittebat tres alias, quæ tamen publicæ subseruebant. Vnam sui ipsius & familiæ suæ, oblatione vituli pro peccato, & arietis in holocaustum. Alteram tabernaculi & Sanctuarij, partim vapore, seu nebula accensorum.

cipes ac Reges, qui deinceps fecuti sunt, hoc præcepto obligabantur, semper in negotiis arduis debant recurrere ad Pontificem, & ex arbitrio illius, vel agere quippiam, vel omittere. Et benè cum iis actum est, qui hoc fecerunt; malè cum iis, qui neglexerūt. Exempla prioris generis sunt hæc. Primo, Daud Rex cum intellexisset insidias sibi parati à Saule, accessit Abiathar Pontificem, & per eum quæsiuit à Deo, an tuto possit esse in urbe Ceila: & an Ciues Ceilitæ essent eū tradituri Sauli? Regum 23.9. Secundo, idem Daud alio tempore per eundem Pontificem consuluit Deum, an deberet persequi Amalecitas, qui spoliauerant & succenderat urbem Siceleg.1. Regum 30.6. Quod autem Daudi familiare fuerit, hoc modo interrogare Deum, patet 1. Regum vigesimo secundo, versu decimo quinto, ubi Achimelech Pontifex accusatus apud Saulem, quod Daudi adhæreret, & pro eo Dominum consuluisse, respondit Regi: Num hodie cœpi pro eo consulere Deum? quasi dicat, saepius ante hæc tempora id feci.

8. Exempla posterioris generis sunt hæc. Primo, Iosue & alij principes filiorum Israël decepti sunt à Gabaonitis, eo quod fœdus cum illis pacti essent, non consulto prius per Pontificem Deo. Iosue nono, versu 14. Secundo, Saul elatus victoria, & præfusus suis viribus, cum vellet inconsulto Deo, Philistæos persequi, monitus à Pontifice est, ne id faceret. Et cum postea consuluisse Deum, nullum responsum ab eo impetravit. Itaque non potuit vti victoria, sicut animo destinauerat: primo Regu 14.36. Tertiò, filij Israël pugnaturi cum Beniamitis, consuluerunt quidem Deum per Pontificem,

tificem, sed tamen quia magis confidebant suis copiis, quam Dei oraculo, multi ex iis cæsi ac fugati sunt. Iudic. 20. 22.

9. Quæres, quo modo, vel ritu, solitus sit Pontifex consulere Deum in huiusmodi casibus? Respondeo. Alter Moyses, aliter alij Pontifices soliti sunt id facere. Moyses ingressus tabernaculum fæderis, facie ad faciem cum Deo loquebatur, sicut solet homo cum amico loqui. Exodi 33.11. Alij Pontifices, qui postea fecuti sunt, induiti Ephod, loquebantur cum Deo, non quidem facie ad faciem, sed aliquo alio peculiari modo, qui tamen apud authores & interpres non satis compertus est, ut latius dicam in seq. q. §.16.

## QVÆSTIO V.

*Quo vestitu & ornatu usi sint Sacerdotes & Pontifex?*

1. **L**uitæ non habebant sacrum ornatum, sed soli sacerdotes & Pontifex. Nec tamen illo vtebantur, nisi eo tempore, quo in Tabernaculo vel templo ministrabantur. Erant autem octo ornamenta Pontificis. 1. feminalia linea. 2. vestis linea. 3. Balteus seu cingulum. 4. tunica hyacinthina. 5. Ephod, seu superhumerales. 6. Rationale iudicij. 7. Cidaris seu tiara. 8. Lamina aurea. De his agitur Exodi 28. per totum. Et quidem quatuor ex iis erant propria Pontifici, ut tunica hyacinthina, Ephod, Rationale, & Lamina aurea: reliqua communia cum aliis Sacerdotibus. De singulis aliquid dicendum est.

2. Igitur

2. Igitur Pontifex, cùm ad ministrandum accedebat, primo loco induebat feminalia seu femoralia linea, *allegendam carnem turpitudinis sua*, à renibus usque ad femora, ut loquitur Scriptura Exod. 18. 4. Erant autem hæc feminalia, veluti caligæ quædam, quas pedibus insertas (ut ait Iosephus) quasi dimidiatas braccas ad ilia constringebat. Aliqui putant ex bysso retorta fuisse confecta. Nobis sufficit, quod à Moyse linea appellentur.

3. Post feminalia, proximè induebat tunicam lineam, quæ duplici nomine fuit appellata. Primo, linea stricta, Exodi 28. 4. Secundo, subucula linea. Leuitici 8. 7. Inuenio duas causas cur stricta fuerit appellata. Una est, quia ad cutem stringebatur. Nō enim erat laxa & ampla, sed quætitati corporis commensurata. Altera, quia balteo seu cingulo stringebatur. Leuit. 8. 7. Probabile est, fuisse similem tunicae Ioab, de qua 2. Regum 20. 8. Porro Ioab vestitus erat tunica stricta ad mensuram habitus sui. Nisi quod hæc fuerit exterior, illa interior.

4. Hæc vestis linea constringebatur balteo seu cingulo, inter umbilicum & pectus. De quo D. Hieronymus ita scribit ad Fabiolam: *Hoc cingulum in similitudinem pellis colubri*, qui exuit seneclum, sic in rotundum texum est, ut marsupium longius patet. Textum autem est sub tegmine cocci, purpura, hyacintho, & stamine byssino, ob decorum & fortitudinem: atque ita polymitz arte distinctum, ut diuersos flores ac gemmas, iuris manu, non textas, sed additas arbitris. Lineam turicam, inter umbilicum & pectus, hoc stringunt balteo. Similia habet Iosephus libro 3. antiquitatum, cap. 8.

5. Post balteum sequebatur tunica hyacinthina,  
quæ

quæ erat laxa, per modum vestis talaris. In eius fimbria inferiori per circuitum pendebant alternatim mala punica & tintinnabula aurea, ut ex eorum sonitu perciperetur ingressus & egressus Pontificis, quando intrabat vel exhibat Sæctuarium. Exod. 28. v. 35. Dicebantur autem mala punica, non quod reuera essent, sed quia ex Hiacintho, purpura & coco bis tincto, confecta erant instar malorum punicorum. Exod. 28. 33.

6. Super tunicā Hyacinthinam erat Ephod seu superhumeralis, quod tegebat humeros, & anteriorē partem usque ad cingulum. Erat autē contextū ex auro, Hiacintho, purpura, coco bis tincto, & bysso retorta. Exod. 28. 6. In utroque latere versus humeros habebat duos lapides onychinos, auro inclusos: unum à dextris, alterum à sinistris; in quibus sculpta erant nomina duodecim filiorum Israël: sex nomina in uno lapide, & sex in altero, iuxta ordinem nativitatis eorum. Exod. 28. 9.

7. In anteriori parte superhumeralis, ad pectus Pontificis, ligabatur Rationale iudicij. Hebræi vocant ḥōsēn, id est, pectorale. Græci λόγιον, vel λόγεῖον, id est, rationale. Conficiebatur autē ex eadem materia, qua Ephod, nempe ex auro, hyacintho, purpura, coco bis tincto, & bysso retorta. Figura quadrangulū: densitate, duplex ad Ephod relatū: longitudine & latitudine, mensura palmi. Exodi 28. v. 16. In hoc rationali erant duodecim lapides pretiosi, inclusi auro, & distincti per quatuor ordines: in quibus etiam sculpta erant duodecim nomina filiorum Israël. Ibidem versu decimo septimo. Atque ita confectum & exornatum, catenis aureis & fasciis tam firmiter affigebatur superhumerali,